

No. 80. 1379. 30. Nov.

Die Markgrafen Friedrich, Balthasar und Wilhelm genehmigen, dass der Rath und die Bürger zu Leipzig die 75 Pfund jährlich, mit welchen sie dieselben an Heinrich und Dietrich Hartung zu Erfurt gewiesen haben (No. 74), um 750 Pfund einlösen und unter den bisherigen Bedingungen wieder versetzen.

Wir Friderich, Balthazar vnde Wilhelm von gotes ꝛ. bekennen vnde tun kund ꝛ. Als wir die bescheidin lute ratismeistere rat vnde burgere gemeynlich vnser stat Lipczk vnser lybin getruen gein Henrich vnd Ditherich Hartungis burgern zcu Erfford mit fuff vnde sybinczig phunden geldis Erffortischer phenge vor achtehalbhundert phund Erffortischer phenge vorsaczt vnd si mit den funf vnde sybinczig phunden ierlich zeureychen an die egnanten burger zcu Erfford gewist habin, daz wir den selbin vnsern burgern zcu Lipczk die gunst vnd vnsern willin dorczu gegeben vnde geheizin habin, also daz sie die egnanten fuff vnde sybinczig phund von Henrich vnde Ditherich obgnant vor achtehalb hundirt phund losin sullen vnde mogin, vnde sullen ouch von vns gute macht haben, die fuff vnde sybinczig phund geldis andern luten vort ye eyn phund vor zcen phund Erffortischer phenge zcuorsezene; vnde wenne sie die gulde vorseczzen eder vorschribin zcuereichene, daz ist vnser guter wille vnde geheize vnde wollin yn keine wiis doryn grifen noch vallen, noch sie keiner wiis doran hindere noch nymant von vnsern wegin, doch also, wenne die obgnanten vnser burgere die egnante gulde vnde rente vorseczzen, daz sie vns vnde vnsern erbin ye eyn phund vor zcen phund Erffortischer phenge zculosene sullen gebin ane widerrede, wenne eder wilche zciit wir eder vnser erbin die widerlosin wollin vnde an yn muten. Vnde wenne wir die losunge tun wollin, daz sullen wir yn eyn virteyl iars vor send Michels tage vore vorkundigin vnde sullen ouch die bezalunge tun vor dem selbin send Michels tage, ab wir der losunge muten vnde tun wollen. Ouch alle die wile wir die obgnanten fuff vnde sybinczig phund Erffortischer phenge von yn eder von den, den sie die vorsaczt vnde vorschribin hetten nicht losten, so sagin wir sie der ierlichin die zciit quid ledig vnde los mit orkunde dises briues, doran wir vnser insigel wizzintlich habin lazin hengin. Dorbie sint gewest vnde sint gezcugen die edeln er Gebehard here zcu Querford, er Friderich von Schonburg here zcu Gluchow, die gestrengin er Ditherich von Wiczeloubin, er Friderich von Kotewicz, er Henrich von Loucha, er Henrich von Malticz vnde ander lute gnug ꝛ. Datum in die sancti Andreae anno LXXIX°.

Nach dem Cop. 31 fol. 6^b im K. Haupt-Staatsarchiv zu Dresden.

No. 81. 1380. 29. Aug.

Vertrag zwischen den Gerbern und Schuhmachern.

Wir ratzlute unnd gesworenen der [stat zcu] Liptzk aller dreyer rethe bekennen öffentlich, das die erbarn Jacob Meinhart der gerbermeister mit allen seynen